

Гъит учву Рамазандин вазли гъидису ушвар, гъаплу гъудгнар,
гъурху дюъйир Аллагъди ﷻ къабул апІри!

Бисмиллагъи ррягъмани ррягъим!

السلام

АССАЛАМ

www.assalam.ru

НА ТАБАСАРАНСКОМ ЯЗЫКЕ

МУСУРМНАРИН ГАЗАТ

№10 (59) октябрь 2008-пи йис. / Шавваль 1429 / Табасаран чІалниинди вазлик саб ражну удубчІуру. Къимат 15 манат

МУБАРАК

Рамазандин машкврахъди мубарак гъапІну

ВАРИДАРИХЪНА ИМШАХЛУ АЛЛАГЪДИН ЧЧВУРНАХЪАН!
Аъиз гъардшар ва чйир!

Дагъустандин мусурмнарин Духовный управленийин улихъ – кІулихъ хъайидарин ва хусуси вуди йиз терефнаан учву Ид – уль- фитрин гирами ва аку машкврахъди мубарак апІураза. Гъит Аллагъу Тааълайи учву Рамазандин вазли гъидису ушвар, гъаплу гъудгнар, гъурху дюъйир ва вари ужувлан ляхнар къабул апІри ва гъаддиз дилигнугу Дугъу гизаф ражари савабар туври! Гъадму гирами ва берекетлу вазли учву гъаплу ужувлар учвухъди умурлуг вуди гъузри ва гъит гъадму вазли учвухън гъудучІузуз гъахъи вари гунагънан ляхнарра учвухън ярхла ишри!

Учвуз дериндиан ва кІваантІан дин хъапІувал, къюбеб дюнйиризра хас вуйи ужудар ляхнар ва кІваантІан хушбахтвал ккун апІураза!

Учвухъна гъюрмат ва ккунинин уърхюрйир,
Дагъустандин мусурмнарин Духовный
управленийин Председатель
муфтий Агъмад – гъажи АБДУЛАЕВ

Вари шад гъахъну

Рамазандин вазлин ушвар дисбан къяляхъ къайд апІури шлу машквран йигъ (Ураза байрам) вари яшарин мусурман гъардшариз ва чйириз шадуб ву.

» 4



Ас-Салам-фото

ГЪЯЖ – 2008

Гъяж тешкил апІбаъ дигиш'валарикан

Сентябрин 12- пи йигъан Дагъустан Республикайин Гъюкуматдиъ Гъяж- кампания- 2008 кІуру рабочий дестейин заседание гъабхъну.

» 4



Ас-Салам-фото

Пенсионерарин арайиъ конкурс

Октябрин вазлин сифте кІуларийъ пенсионерарин арайиъ конкурс кІули гъубшну. Думу дюзди гъудган апІбаз ва исламдин бинйириан ужудар агъгювалар улупбаз бахш дапІнайиб вуйи.

» 4



Ас-Салам-фото

КІВАИН АПІУХЪА

Исламдиз къаршуди дяви ясана ужударстариина хюрч апІуб

Рягъматлу Аъдулла Аълишаев кІваин апІури

Гъажи – Мурад РАЖАБОВ,
«Фикър» кІуру
мялуматарин центр

Рамазандин ваз улубкънай вахт вуйи, мусурмнари ушв гъибису къюдпи йигъ. Гъадму гирами вазлин йигъа-

ри гъамциб гъядиса шлувал шлин фагъум - фикирназ гъюйихъа? Пис ляхнариз гъич сарра ккилигурадайи - варидари гъаму вазли чпи Аллагъдиз ﷻ гъуллугъ апІбаз бахш апІбакан фикрар апІурайи. Хъа амма дерин

пашманвалиинди гъайифвал зигухъа, инсафсуз хабривари мусурмнар мягътал гъапІну - Урусатдиъ адлу журналист, «ТВ - Чиркей» телекомпанияйин кІулин редактор Аъдулла Аълишаев йивну гъакІну.

» 6


НУМРАЙИЪ:

ГЪЯЖ - 2008

2

3

Гъяждиз гъягъру-дариз кюмек вуди



5

ХАЙИРЛУ ТЕКЛИФАР

Гъаз Дагъустандин мусурмнарин арайиъ гафнан сабвал адар?



7

ПОДПИСКА - 2009

«Ассалам» – халис мусурмнарин газат



8

СУАЛАРИЗ
ЖАВАБАР



ГЪЯЖ – 2008

Пирмягьямед КЪАСУМОВ

газатдин редактор

Гъядиз гъядгърудариз

Гъит Аллагу Тааълай ичв гъаж къабул апри!

Гъюрматлу мусурман гъардшар ва чйир! Магъа учвкан хайлиндар ичв мусурманвалин фарз тамам аплуб метлебниинди гъаму 2008 - пи йисан гъаж клули гъабхуз гъазур шула. Гъелбетда, гъаж клули гъабхувал лапра жавабдар, хъа амма мубарак ляхин ву. Ичв гъаж тешкилувалиинди клулиз адабгъбан бадали учвуз учхъан шулю кюмек аплуз, саб жерге хайирлу теклифар тувуз ккундучуз. Белке гъаму газатдин кюб машнаъ туврайи сюгъбатну учвуз гъядиз гъабган ва думу клулиз адабгъбан шартларикан цийи аьгъювалар гъадагуз кюмек аплур. ИншаАллагъ, нагагъ учвуз гъаддикан сацибкъана хайир шулуш, учу къадарсуз шад хидича ва Аллагу Тааълайикан ичв киваъ утлубкънайи ният ягъурлуди клулиз адабгъувал ккун аплурача.

Гъядиз гъядгъюз ккайи гъарсаркас Гъяддин вариталабар аьгъю аплуз мажбури ву ва хулъан чахъди гъядиз гъядгъюрайи рякъюн юлдшари ясана Меккайин агъалйири чаз тувру аьгъювалариин ихтибарлу, умудлу вуза клури, удучвну ккундар

имам Навави

Гъаж клулиз адабгъувал чарасуз вуйи хъуб шартI

Сабпи шартI - Исламдиъ хъувал.
Къюбпи шартI - хусуси азадвал.
Шубубпи шартI - фикирлувал.
Юкьубпи шартI - яшназ дуфнайивал.
Хъубпи шартI - гъядиз гъядгъюз мумкинвал ади хъувал.

Гъядиз гъядгъюз мумкинвал айивал къюб жюрейинуб шулу:

Гъаж жвуван жвувхъан клули гъабхуз шулу, хъа эгер жвуваз клули гъабхуз къувват (сагъвал) адарш, жвувхъанди гъядиз гъядгъюз жара касдиз табшурмиш аплувал ихтибар аплуз шулу.

Дишагълийихъан Гъядиз гъядгъюз шу шартIар

Эгер дишагъли Гъядиз гъядгъюруш (жара йишваризси), дугъахъди чан жилир ясана мягърам (лапра багахълу, чан гъудгнин ккудрутIру кас) хъади ккунду. Эгер дишагъли чарасуз вуйи Гъядиз гъядгъюруш, думу гъудуркъу, Аллагъдихъан ﷻ гучвал кайи дишагълийирихъди душну ккунду. Эгер думу аьлава Гъядиз (сунна) гъядгъюруш, думуган дугъахъди чарасуз чан жилир ясана жара мягърам

(лапра багахълу) хъади ккунду. Гъаму дюшюшдиъ дугъхъан фукъан ихтибарлу дишагълийири вушра, гъадририхъди гъядгъюз шулдар.

Гъаж клули гъабхуз улупнайи юкьуб ният:

1. Ифрад. 2. Таматту. 3. Къиран. 4. Итлакъ.

Ифрад Гъаж Уьмайихъан жаради клули гъабхуз вуйи ният ву. «Таматту» клуру гафназ ишлетмиш аплувал клуру мяна а. Думу гъадму клуру гаф вуки, микъатдиъ Уьмара клули гъабхуз ният урхуру ва гъадмуган гъядиз душнайириз Гъаж клули гъабхайиз улихъна игърам (палат) алабхъбан къяляхъ къадагъа дапнайи терефар вари ишлетмиш аплуз ихтияр тувру. Дугъхъан аьдати палат алабхъуз шулу, клул алдаплуз шулу, щибар (щавар) алдатлуз, игърам (палат) алабхъбан къяляхъ къадагъа аплру имбу ляхнарра

клулиз адагуз шулу. Гъадму жюрейин мумкинвалар ишлетмиш аплуз таматтуин ният гъапган шулу. Хъа амма гъаци аплбазлигну журум иливуру. Къиранди Гъаж ва Уьмара сатиди клули гъахуз ният аплувал улупуру. Гъядиз вуйи ният Гъяддин вахтна дарди жараган аплуруш, дидиз къувват шулдар. Эгер ухъу ният жара вахтна урхуруш, думуган гъаж къабул аплувал гъисаб шулдар. Вари ниятарикан варитан ужубсиб Уьмайиз вуйи ният жаради урхувал ву. Хъасин ужубсиб ният гъисаб аплру дюшюш Гъядиз ва Уьмайиз сатиди ният аплувал ву, хъасин вари дюшюшариз дюзди гъюру ният итлакъ ву. Гъажси Уьмара ухъу саб саб микъатдилан ккебгъурхъа. Эгер ухъу Уьмайиз жаради ясана Уьмайиз ва Гъядиз сатиди ният урхуруш, думуган ухъу журум тувну ккунду. Эгер ухъу журумдин ерина мал убккуруш, думу Исламдин вари талабариз жаваб тувруб вуди ккунду, къурбан гъаплу мал убккъахъна вуйи талабарси. Эгер мал убккуз мумкинвал адру кас гъашиш, дугъу ушвар дисуб лазим ву (Гъяддин вахтна шубуд йигъан ва Гъяддиан ватандиз къяляхъ хътакган ургуд йигъан).

Гъаж клули гъабхурайири гъарсар касдин улихъ дийигънайи вазифйир

Гъаж клули гъабхурайи гъарсар кас Гъядиз гъядгъюруш касдин улихъ дийигънайи вари вазифйир ва шартIар

аьгъю аплуз мажбури ву.

Ихъ имам Нававийи (гъит Аллагъ ﷻ дугъкан рази ишри) «Изах» клуру чан китабдиъ клура: «Гъядиз гъядгъюз ккайи гъарсар кас Гъяддин вари талабар аьгъю аплуз мажбури ву ва хулъан чахъди гъядиз гъядгъюрайи рякъюн юлдшари ясана Меккайин агъалйири чаз тувру аьгъювалариин ихтибарлу, умудлу вуза клури, удучвну ккундар». Гъит гъарсари гъяддин вазифйир чав чалланди аьгъю аплуз чалишмиш ишри. Гъит Аллагъди ﷻ ухъуз гъяддиан, лазим вуйи саягъниинди Гъяддин вари вазифйир ва талабар тамам дапну, жвуван хулаз хъадакнуну гъюз кюмек аплри!

Къаба шли тикмиш гъапIнуш, гъаддикан сакъюдар далилар

Къабайин хулан сабпи бина (шибрит!) дивдар малаикар ву.

Къурпир вуди Къабайин хал Адам пайгъамбари дивну.

Шубурпидар вуди Къабайин хал Адамдин ﷺ бай вуйи Шисди тикмиш гъапну.

Юкьурпир вуди Къабайин хал Ибрагъим пайгъамбари ﷺ чан бай Исмайилихъди сатиди тикмиш гъапну.

Хъурпидар вуди Къабайин хал



Ас-Салам-фото

тикмиш гъапIдар Нюгъдин тухмар – Амаликтар ву.

Иирхъурпир вуди Къабайин хал тикмиш гъапIру Мазаскарин бай Гъарис вуди гъахъну.

Ургурпир вуди Къабайин хал тикмиш гъапIру Къилабдин бай Къусайн Вуд гъахъну.

Миржирпир вуди Къабайин хал дивдар Мугъаммад Пайгъамбарин ﷺ иштиракниинди Къурайшитар вуди гъахъну.

УрчIурпир вуди Къабайин хал дивур Зубаирин бай Абдуллагъ вуйи.

ЙицIурпир вуди Аль - Гъижра ерлешмиш дубхънайи йишвхъанди Къабайин хал дивур Гъажаж вуди гъахъну (къюбеб терефарихъанди удучIвру йишварихъан цал илтIибкIбиинди)

Аллагу Тааълай Меккайиъ динагълийириин дюъйир къабул апру йицIихъуб йишв

Дюъйир къабул апру сабпи йишв Къабайин илтIиклуз хъюгъру сифтейин йишв ву.

Къюбпиб – Мультазам - думу Къабайин ракнарин ва Гъажар уль - Асваддин арайиъ айи йишв ву.

Шубубпи йишв шид аьбгъру кландин кланак.

Юкьубпиб – Къабайин айтI айи.

Хъубпиб – Зам - замдин булагъдин багахъ.

Иирхъубпи йишв – Сафа тепейиин.

Ургубпиб – Марвайин тепейиин.

Миржибпи йишв – Сафайин ва Марвайин тепйирин арайиъ.

УрчIубпиб - Ибрагъимдин ﷺ Макамдин къяляхъ.

ЙицIубпиб – Арафатдин дагъ.

ЙицIисабпи йишв – Муздалифдин жилиин.

ЙицIикъюбпиб – Минайин жилиин.

ЙицIишубубпиб – кликIлар ккатIахъру сабпи йишв.

ЙицIиюкьубпиб - кликIлар ккатIахъру къюбпи йишв.

ЙицIихъубпиб – кликIлар ккатIахъру шубубпи йишв.

Гъяддин чарасуз вуйи аьдатар

1. Гъядиз микъатдиъ учIувал.
2. Муздалифдиъ йишв адапIувал.
3. Минайиъ аьхюнуб пай йишвар адаувал.
4. Къурбан аплру йигъан Жумрат аль- Акабайиъ кликIлар ккатIахъувал, хъа гъацира ташрикъдин йигъари вари шубред Жумратариъ кликIлар ккатIахъувал.
5. Гъяддиъ учIвхъанмина къадагъа дапнайидари ляхнар батIул аплувал.

**ГЪИТ УЧВКАН ГЪИЧ САРИРА ЖВУВАН ГЪАРДШИХЪНА ГЪЕЛЕ МАРГЪКЪАНА ГЪАДРАБГЪРИ:
Я ЗАРАФАТНИИНДИ, ЯСАНА КІВААНТИАН (Абу Дауд ва Турмизи)**

ГЪЯЖ – 2008

КЮМЕК ВУДИ

Гъяждин аьдатаринна Гъяждин шартларин арайиь айи фаркъвал гъаддиь а, фицики, эгер Гъяждин саб шарткъана ухьу тамам дарапиш, думуган Гъяж клуи гъабхувал гъисабназ гъадабгурдар (къабул аплурдар). Хъа нагагъ чарасуз вуйи аьдат клулиз адрабгъиш, Гъяж къабул аплуру, хъа амма гъаддиьди саби журум тувну ккунду. Эгер гъяждиз гъягъюз мумкинвал айи кас Гъяждиз дурушди кечмиш гъахъиш, гъадму касдин дакъатаринди жара касдиьхан дугъхъанди чав гъитнайи дакъатаринди Гъяж клуи гъабхуз шулу.

Гъяждин шартлар

Дурар вари йирхъуб ву:

1. Гъяж клуи гъабхуз айи ниат.
2. Аьрафатдин йигъан Аьрафатдин дагъдиина гъовал.
3. Къабайилан чарасуз вуди илттиклувал.
4. Сафайин ва Марвайин арайиь айи тепйириьди гъягъювал.
5. Вари клул ясана клуин саб пай алдаплувал (искан клул клуллан шубуб кушкъана улдугъувал).
6. Аьдатар хъади - хъади клулиз адагъувал. Эгер ухьу гъадму йирхъуб шартнакан сабкъана гъидипиш, думуган Гъяж бегъемди тамам дапнайивал вуди гъисаб шулдар. Рукну, яни шартI - думу ухьу клулиз адагъурайи аьдатарин гъяракатариз дахил шулайиб ву: эгер ухьу думу тамам гъапиш, думуган ухьу Гъяждин вахтна гъаплу ляхнар къабул аплуру, даршиш - къабул аплурдар.

Аьрафатдин йигъ

Аьрафат Меккайиьхан II – 12 км. манзилнаь ва 6,5 км. яркъушнаь гъатлабцнайи дере ву. Инсанар дийигъру йишв дагъдин улихъ ерлешмиш дубхъна (ягълишин 60 м.), дидиз Жабаль аррягъман ясана Жабаль Аьрафат клуру. Мусурмнарин къисайиз асас духъну, иллагъки гъаму дагъдин улихъ Женнетдиан адаьну вуйи Адам ва Гъява гюрюшмиш гъахъну.

Мекка

Мекка метлебувал жигъатнаан мусурмнарин саби шагъур ву. Думу Уьру гюлин гъирагъдиьхан 80 км. ярхлаьди ерлешмиш дубхънайиб ву. Меккайиь ихъ Мугъяммад Пайгъамбар ﷺ бабкан гъахъну. Агъалйир чан гъавриь адрахърувал ва наразивалар арайиз гъовал себеб вуди думу Масрибдиз – Мединайиз кючмиш хъуз мажбур шулу. Чаз къаршу вуйидарин зини гъаливал гъазанмиш апбалан къяляхъ Мугъяммадди ﷺ Кяба цийи алапну. Гъаддин къяляхъ гъадму шагърин гъваларихъди варитлан



Ас-Салам-фото

клуин ва асас мистан- аль- масжид аль- Гъярам ччвур тувнайи мист цаларихъди илттиклуру. Мусурмнарин къялан аьсрарин девриь (7- пи- 15- пи аьсрар) Мекка Аллагъу Тааьлайин дин хъапбан ва ихтиярар уьрхбан центр вуди гъабхъну. Гъидин йигъазкъан Мекка дюнъийин вари мусурмнар сатли аплу меркез вуди гъубзра. Мекка ахъю ва бици гъяждин шагъур ву.

Кяба

Кяба Исламдин варитлан асас ва гирами йишв ву. Гъудган аплу вахтна вари дюнъийин мусурмнар Кяба ерлешмиш дубхънайи Меккайин терефназди илттиклуру.

Аллагъди ﷻ Адамдиз ва Гъявайиз



Ас-Салам-фото

багъишламиш гъапну. Багъишламиш апбан ва Аллагъдиьхъна ﷻ сатли хъпан аьгъвалат Аьрават дагъдиин клуи гъубшну. Гъадму дагъдиз Жумартвалин Дагъ – Жабаль ар - ррягъман клуру. Чаз багъишламиш апбан лишан вуди Аллагъди ﷻ Адамдиз успагъи Лизи гъван гъаплу- аль Гъюжр аль Асвад. Гъадму гъадиса киваин апбан гъюрматназ Аьрафат дагъдин багахъ Адамди ва Гъявайи гъадму Лизи гъвандин зини Кябайин саби ишигъ (акушин) дивру. Жюрбежор гъикаятариь ктибтурайиганси, хъасин гъадму гъван, инсанарик кайи гунгъар

себеб вуди, клуру гъабхъну, клури шулу.

Гъярам бейт – Аллагъ

Мусурмнари Гъярам Бейт - Аллагъ ﷻ Меккайиь асас гирами йишв ву, клури гъисаб аплуру, мусурман дару касдиз гъадушвазди учъувал къадагъа дапна. Аьраб члалниинди «Гъярам» клуру гафназ кюб жюрейин мяна а: «гирамиб» ва «къадагъа дапнайиб». «Бейт – Аллагъдиз ﷻ» Аллагъдин ﷻ Хал клуру. Гъамусъятна Гъярам Бейт



Ас-Салам-фото

Аллагъ ﷻ хъуб мурччванкан ибарат вуйи, лапра ярхи дарамат ву, гъаддин гъацI къялаь лапра ахъю къадар йишв а ва дидин айтлан икриь (хяннаь) гирами Кяба ерлешмиш дубхъна.

Аьлимари тасдикъ гъапганси, Кяба ва Мекка вари дюнъийин къурамитдин гъацIкъял ву. Иллагъки кяба али йишвъин ихъ Жилин магнитдин центр ерлешмиш дубхъна клури шулу.

Медина

Аьраб члалниинди гъаму гафназ «Мадинат ан – Наби» ясана «Пайгъамбарин ﷺ шагъур» клуру. Думу къадар жигъатнаан мусурмнарин



Ас-Салам-фото

къюбпи ахъю шагъур ву. Гирами Къуръан гъаплайиз улихъна Мединайиь гъарвахтна аьрабарин тухмаринарайиь

дяви гъябгъюри гъахъну. Гъацира иудейириин гизаф къадар тухмарихъди гъалмагълар арайиз гъюри гъахъну. 622-пи йисан Мугъяммад Пайгъамбар ﷺ Меккайиан Мединайиз кюч шулу.

Думу гъадушваь чан уьмрин аьхиризкъан яшамиш гъахъну ва саби мист тикмиш гъапну. Мединайиь Пайгъамбар ﷺ, халифар Абу Бакр, Уьмар ва Уьсман кечмиш шулу ва накъвдик (никърик) кивну.

Мединайиь пайгъамбарин ﷺ мист

Къисйириан мялум дубхънайиганси, Мугъяммадди ﷺ мист тикмиш аплуб метлебниинди кюьр балхъан 10 динарихъ жил масу гъадабгъуру – Сахлийиьхан ва Сухейлийиьхан ва тикилиш дивру. Дидин жилин, чан хпир Аьйшайин хулаь Пайгъамбар ﷺ накъвдик (никърик) кивна. Мистан ахъюшин гъамус 165 000 квадрат метр ву.

Гъадушваь сабишвъинди 600 агъзурихъна касдиьхан гъудган аплуз шулу. Пайгъамбарин ﷺ мистъин 27 успагъи клякар ал.

Меккайиь айи Аль Гъярам клуру мистан къяляхъ Пайгъамбарин ﷺ мист дюнъийиь варитлан гирамиб вуди



Ас-Салам-фото

гъисаб аплура. Гъамци дупна: «Йиз ﷻ мистаь гъаплу гъудгъиз жара мистариь гъаплу гъудгъаризтлан агъзур ражну багъалуди къимат тувра, Меккайиь айи Аль Гъярам мистаь аплуру гъудгнар ктарди.

Хъа Аль Гъярам мистаь аплуру гъудгнар дюнъийин жара мистариь аплуру гъудгнартлан варж агъзур ражну артухъди къиматлудар ву».

Аьзиз мусурман гъардшар ва чйир! Гъит Аллагъу Тааьлайи ичв Гъяж ва учву аплуру ужувлан ляхнарна дюьйир къабул аплри!

**ГЪИТ КЪЮР КАСДИ ШУБУРПИ КАСДИН ИШТИРАКНИИНДИ ЖИНИ СЮГЪБАТ ДАРАПИРИ,
ФИЦИКИ ДИДИ ДУМУ ПАШМАН АПИДИ**

ГЪЯДИС

ХАБРАР

Пенсионерарин арайиъ конкурс

1 « Конкурс тешкил шагърарин кварталарин гъапдар Дагъустандин мистариъ – гъаму йисан 6- пи мусурманарин Духовный сентябризкъан. Къюбипайнаъ управление ва Дагъустан районарин ва шагърарин Республикаийъ айи РФ- имамари районарин ва йин Пенсионный фонднан шагърарин Пенсионный отделение вуйи. Талитнаъ фондари вакиларихъди

ччурнахъ хъайи мистаъ кљули гъубшну ва гъадушваъ 13 кас иштирак гъахъну.

Конкурсдин иштиракчийриз 10 баллин къайдайинди кымат тувну.

Финалин натижийринди сабпи йишв ва гъядиз гъягъюз путевка Тарумовка гъулан агъали **Микаил Гъяжиевдиз** тувну. Къюбпи йишваз ва 10 агъзур манатдин къадарнаъди вуйи пулин приздиз Мягъячгъала шагъриан вуйи **Нажиудин Нажиудинов** лайикълу гъахъну. Шубубпи йишв Агъул райондин Ричла гъулан агъали **Зайнулла Ибрагъимовди** гъазанмиш гъапну, дугъаз 5 агъзур манатдин приз тувну.

Гъацира финалин гъарсар иштиракчийиз са- сад агъзур манат пул пешкеш гъапну.

Нагагъ шилхъан вуш гъаму ражну гъалиб хъуз гъабхъундарш, пашман фикрар алувал герек дар, фицики 26-пи октябриъ хъана сабсана финал гъабхъанди ву. Гъадушваъ гъалиб гъахъи кас гъядиз гъягъиди.

Хусуси мялумат



Ас-Салам-фото

пенсияйин яшназ дунфнайи фунур мусурман касдихъан вушра иштирак хъуз шуйи, анжагъ диндин хусуси образование айидар ктарди имбударихъан.

Конкурс шубуб пайнаъ кљули гъубшну. Сабпи пай- районарин гъуларийъ ва

сабси сабпи пайнаъ гъалиб гъахъи пенсионерарин арайиъ конкурсар гъухну. Аъхириъ шубубпи пайназ гъалиб гъахъидарин арайиан са- сар кас гъядягъну.

Конкурсдин шубубпи пай Мягъячгъала шагърийъ айи шейх Сайфулла- къадиийн

Вари шад гъахъну

1 « Аъзиз мусурман гъардшар ва чйир! Магъа ухъу гъаму улихънаси ихъ уъмрийъ сабсана багъалу машквар къайд гъапунхъа - Рамазандин вазлин ушва-

дарихъна хулариз гъягъюру.

Гъаму ражнура ихъ республикаийн мусурманари чпин фарз кљулиз адабгъалан къяляхъ машкваран йигъан шаду дакъийкийр гъисс гъапну.

Ав, набалугъар гъаму ражну улубкъу Рамазандин машкваран йигъан, муганайиз чпи аъхникк кучъивнайи вахтнаси дарди, ухди аъхниккан гъуджвну сумкийирра хъади гъуншйирихъна гъягъюри- лицири рякъюйи. Аъдатнаъ абхънайиганси, гъарсаб хизан дурар гъюрувализ ккилигури ва вахтназ улихъна гъяфатар, печейир ва жюрбежюр жара меълишнар гъязур алури шулу.

Ав, Рамазандин машкваран йигъан, мисал вуди гъадабгъиш, Мягъячгъала шагърийъ айи урус ва жара миллетарин ва динарин вакиларира чпихъна гъафи набалугъар ичиди гъаурдайи. Гъадму ляхъниз анжагъ баркаллагъ дупну ккунду, фицики гъаци алували хизандийъ айи берекет артухъ алуру ва миллетарин арайиъ айи аълакыйир имбубсана мюгъкам хъуз ужуб терефнахъинди тясир алуру.

Гъит гъацдар машкваран ва гюрюшар ужувлан терефариз даягъ ишри! Гъит гъарсар мусурман касди гъидису ушвар ва гъапну гъуднар Аллагъу Тааълайи къабул алури!

Амин.



Ас-Салам-фото

рин машквар. Диди мусурман гъардшар ва чйир чиб чпихъна багахъ алуру, ихъ абйир- бабарин накъварихъна (никъарихъна) душну, гъадрикан фикрар- хиялар алуру, дъыйир урхуру ва Аллагъу Тааълайикан чпи гъидису ушвар ва гъапну гъуднар къабул алувал ккун алуру. Аъдатнаъ абхънайиганси, Рамазандин машквар йигъан яшнан бицидар яшнан ахъю-

Мусурман динди ухъуз гъадму йигъан киваъ айи пис къастар адауз ва нагагъ сар касдиз (багахълуийиз ясана гъуншдиз) гиран ктапнуш, багъишламиш алувал ккун алуру. Думу лапра ужуб ляхин даринхъа?!

Хъа бицидарин шадвал, «Ичв улубкънайи машквар мубарак ибшри!» кљури гъапихъан чпиз жумартвалиинди жюрбежюр меълишнар тувруган, артухъди ашкар шулу.

Гъяж тешкил апІбаъ дигиш'валарикан

1 « Дидин ляхъниъ муфтийин гъяждин месэлийриз лигру заместитель, вари шубуб гъяж- фирмийрин вакилар (ДУМД- ди гъядиз гъягъювал тешкил апІбаз теклиф дапнайидар), РД- ийи айи РФ- ийи МИД-дин вакилар, республикаийн Гъюкуматдин диндин месэлийриз лигру Комитетдин улихъ- кљулихъ хъайидар ва «Дагъустандин авиалинийир» кљуру авиакомпанияйин ахъюдар иштирак гъахъну.

Заседание сарпи вице- премьер Низами Къазиевди кљули гъубхну. Гъял алуз гъаму месэлийир адагъну: гъядиз улихъ ккимидитан гъязурлугар гъахувал, визийир дюзмиш алувал, КСА- ийи дахъру хал- йишв арендаийиз гъадабгъувал, гирамивалин кюмек тувбан гъяж ва гъ. ж.

Заседаниейин натижийриз асас духъну саб жерге метлеблу къарарар адагъну. Дурари гъядиз гъязурлугар гъабхан ляхин ужуб терефнахъинди дигиш апІди ва гъаддихъди сабси гъядиз гъягърударин рякъюн ва дурар йишвахъна хъуркъбан месэлийирра.

Гъяж- фирмийрин руководителарикан сар вуйи Мягъямед Мачилаевди, гъамусаяъ дурари Сауд Аравияйин «Аль- Лама тревел» кљуру авиакомпанияйихъди мяслаяътан улхбар кљули гъахура. Думу тажрубалу ком-

панийрикан саб ву, хъа амма Мягъячгъалайин аэропортдиз ахъю самолетар къабул алуз мумкинвалар адар. Гъадму гъялнаан удучвуз айи ялгъуз рякъ Бакуйиан Мединайиз рейсар кљули гъахувал ву. Гъаддихъди сабси Бакуйизкъан гъядиз гъягъру ксар поезддиди ясана автобусдиди гъахуз шулу. Гъамусаяъ вари жорйириан мяслаяътан улхбар гъахура.

1980 кас гъабхъанди ву, хъа амма гъадму къадар дигиш хъуз- ра мумкин ву. Рейсар «Боинг» фирмайин самолетарийди тешкил апІбанди ву. Саб самолетдиди 220 ясана 340 кас гъахуз шулу. Гъациб дюзюшдийъ 45 касдикан ибарат вуйи гъарсаб дестейиз са- сар руководитель духъну ккунду. Дидланна гъайри, Аърафатдийъ, Минаийъ ва жара йишварий гъуллугънаъ учъуру (хъайивал алуру) ксарин къадарра артухъ хъиди.

Гъаму йисан автотранспортдихъна вуйи тлалабар ижми гъапну. Ккудушу йисарихъди тевган, гъаму йисан гъюз ихтияр айивалин удостоверение ва карточка хъади ккунду Дидланна гъайри, инсанар гъядиз гъахуз ва къяляхъ хуз варихалкъарин транспортдихъна вуйи тлалабар тамам дапну ккунду. Жилин транспортдиди гъягърудариз тлалабар муганайиздинстар вуди гъузра..

Дагъустандин гъяж - компанияйин мялумат

Гъяж- турар жюрбежюр компанияри кљули гъахурайивализ лигну, ва шлин терефнаан гъягъюрайидар вуш- дарш агъю алуз читинвалар алахъурайивал сеbeb вуди Дагъустандин гъяж- компанияйи гъядиз гъягъру чпин ксариз хусуси бейжикар (лишнар) дюзмиш дапна. Таможнийирийъ, транспорт дийибгъуру йишварийъ, Минаийъ ва Аърафатдийъ ва шагърарийъ хъайивал алувал анжагъ гъадму лишнар айидаризтан шулдар. Гъядиз гъягъру гъарсар касдиз гъядиз кљури гъязур ва заказ дапнайи хусуси сумкийир ва жара лишнар тувиди.



Ас-Салам-фото

ХАЙИРЛУ ТЕКЛИФАР

Чиркейиан вуйи
шейх САИД - ЭФЕНДИ

Дурар сатли апбан шартI айин?

Дагъустандин мусурмнарин арайи гафсабвал адрувализ ва дурари хъан разивалихъна гъюз даршулайивализ гизаф къадар жорбежор себебар а. Инсаният халкъ гапIхъанмина гъаму жорейин наразивалар халкъарин арайи ади гъахъну. Гъарсар пайгъамбарин аьгъювалар тувбариз Аллагъу Тааьлайи гъадму Пайгъамбарин ﷺ вазифийр тьякид аплру душмар гъаьри гъахъну. Имамрин, аьлимарин, авлийрин ва шейхарин терефнаанра чпин вазифийр кIулиз адагъурайивал даккнидар ади гъахъну ва гъамусра а. Наразивалар Аллагъдихъан ﷺ вари инсанар гъякълувалин рякьюхъна хъауз даршлували адар, хъа Аллагъу Тааьлайи гъаму саягъниинди дюнъа яратмиш апбан къайдайи а, дидиз дерин мяналувал тувна.

Гъарсабдикан аьгъю Аллагъди ﷺ гъапну (мяна): «Эгер Узуз вари инсанар ва жинар гъякълувалин рякьюхъна хъауз ккундийиш, дурар Узу хъаьдийза. Хъа Йиз къарар дигиш шлуб дар, Узуз мютлюг даршлудар ва Узухъна хъугъвал алдрудар – ккунш инсанар, ккундушсана жинар ишри- Жегъеннемдиз гъауб ва гъадарихъди ашуб ву (Къуръан, 32:13).

Гъаддихъди аьлакълу вуди гъамциб суал арайиз гъюб мумкин ву: «Эгер Аллагъди ﷺ узу дюз рякьюхъ хъаьнийиш, узу гъякълувалин рякьюхъ хъидийза. Гъаз Аллагъди ﷺ узу дюз рякьюин алаундайкIана?». Гъаму суал Аллагъу Тааьлайиз иблисдира тувнийи. Иблисди гъерхну: «Узу сифте кIуларинмина уву гъякълувалин рякълан алдаувалин амур туунва. Хъа йиз фтинуб тахсир вухъа?» Аллагъу Тааьлайи дугъаз суал тувру: «Уву кIвахънивали ахърувалин гъякълуан вуйи Йиз сифтейин къарарнакан фила аьгъю гъабхъунвуз: дидиз улихъна ясана дидин къяляхъ?» Иблисди къяляхъ кIури жаваб тувган, Аллагъу Тааьлайи дугъаз кIуру: «Ари гъаддиз Узу уву йиз ужварихъан ярхла гъапIунза». Яни иблисди чан гележегдикан аьгъяди гъабхъундар. Эгердидиз сифте кIуларинмина Аллагъу Тааьлайин къарарикан аьгъяди гъабхънийиш, ва гъадму саягъниинди кIвахънивали ахънийиш, думуган дидхъан суалар тувуз ва гъюжатар аплуз хъидийи. Хъа амма дидин мютлюг даршлувал гъадму себебарикан асиллу вуйидар гъахъундайи – думу чан фурсвалиан, аьгъирвалиан Аллагъдин ﷺ амриз ва Адамхъна ﷺ вуйи къаст айивализ лигнуб къаршуди удучIвну. Хъа Аллагъу Тааьлайи иблис мютлюг даршлувалин гъякълуан вуйи чан къарар (амур) думу халкъ аплайиз улихъна гъибикIну, фицики Аллагъу Тааьлайиз улихъ ккимидитIан иблис Чахъ хъпрехърубдикан аьгъяйи.

Саб ражну имам аш - Шафийийиз чан рякью иблис алахъуру. Иблисди дугъхъан гъерхру: «Яраб Аллагъу Тааьлайи узу Чан ужварихъ мягърум аплувал узухъинди илзигувалик гъисаб дайкIана? Гъеле дугъу узу улихъ ккимидитIан мютлюг даршлур вуди улупну». Имамди дугъаз гъамци жаваб тувру: «Эгер Аллагъу Тааьлайи уву увуз ккуниб аплури халкъ гъапIнийиш, думуган Дугъу уву ужувла хъан мягърум аплувал илзигувалик гъисаб шуйи. Хъа эгер Дугъу уву Чаз ккуниб аплуз кIури халкъ гъапIнуш, думуган гъякълувал хъибдар, хъа илзигувал хъибди». Гъадму суалниинди, - гъапну иблисди, - гъякълувалин рякълан ургIулар авлийир алдауз гъабхъунзухъан, хъа уву йиз юкъв гъюбгъюна». Гъаму гафарин къяляхъ думу гъудучIвну гъягъюру.

Гъаз Дагъустандин мусурмнарин арайи гафнан сабвал адар?

Гъамус гъамци гъерхрайи касдихъна илтиклухъа. Дугъу гъерхра: эгер Аллагъу Тааьлайи вахт улихъна ккимиди (сифте кIулиан) дугъаз гъациб амур гъапIнуш, дугъу гунагъан ляхин гъапIну кIури, дугъан тахсир фти а хъа?» Дугъан тахсир гъадди а ки, Аллагъдин ﷺ амрилан ва Дугъан тасдикваларилан улдучIвну думу иблисдин рякьюхъди гъушну, чан нафсдинди ва интIиваларинди гунагъ арайиз гъабхъну. Ухъуз мялум дарударикан аьгъювалар гъитну яни улихъна хъуз ккайиб пувалиинди Аллагъу Тааьлайиз ухъу шариаьтдиз асас духъну яшамиш хъуз буржлу вухъа. Гъаддин гъякълуан ухъуз Гирами Къуръанди ва Мугъаммад Пайгъамбарин ﷺ гъядисари улупура.

Сифте ухъу диву суалихъна хътакухъа. Дагъустандин мусурмнар сатли хъуз варитIан аьхюди манигъвал аплурайиб исламдин диндин гъаври адрувал ва вижнасузвал ву. Гъадму вижнасузвали инсан варитIан чIуру ляхнар кIулиз адагъбахъна хура. Сатли духъну ккунивал лазим ву кIури, гъарийр- чIигъар аплурушур, хъа амма гъадму бадали гъякълукъатди юкIвар иццрудар агуз читинди ву. Яраб сатли хъуз шартIар лазим дайкIана? Мусурмнар из гъякълувал абган зин сатли хъуб чарасуз лазим ву, сифте гъякълуб гъякълувалинди, кучIлиноб кучIливалинди. Гъякълувал абган ва гъякълуб ктабгъбан бадали дерин аьгъювалар ва мюгъкам диндихъ хъугъувал лазим ву. Ухъу, белке, багарихъди гъациб дережайихъна дарфузра мумкин ву.

Аллагъдин диндин машгъул гъахъи халис аьлим, суфий, Аллагъдин ﷺ адлу шейхарикан ва авлийирикан сар вуйи, Пайгъамбарихъди ﷺ сатли гъилихдар гъякью кас Гъясан аль- Басрийихъан гъамусяьт мунафикъар айин, кIури гъерхган, дугъу жаваб тувнийи: «Эгер мунафикъарин рижвар ярхи шуйиш, думуган ликрихъан ликар алдагъуз хъибдайи». Эгер гъеле муганайиздин вахтари гъадму къадар мунафикъар айиш, хъа гъамус дурар фукъан айкIана?! Мунафикъ чан мелзнин дин алириз, хъа юкIв кIуруш динсузвалихъди бегъемди абцIнайириз кIуру. Мунафикъдиз хас вуйи лишан динагъли касдин вари ляхнариз, учв фициб рякьюхъди гъягъюрушра, дугъаз къаршувал улупрувал ву.

Варидариз Дагъустандид мусурмнарин арайи наразивал айивал рякьюра. Зьланди улхуруш, мусурмнарин гъарсаб десте чпин терефнаан сатли хъуз къаршуди дар. Анжагъ гъарсариз учв гъалибчи духъну ва имбудар чан регъберваликди сатли аплуз ккунду. Узу кIураза ки, йиз метлеб вари мусурмнар гъякълукъатди гъякълу рякьюин дийигънайи дестейин регъберваликди сатли аплувал вуйиз. Фуж гъякълур гъахъишра, узу вушра ясана фуж- вуш жарар вушра, гъит Аллагъу Тааьлайи, нягъякълвал терг дапIну, вари мусурмнар гъякълувалин рякьюз гъайихри! Фикир аплураза, фицики мяслаьтнахъна хпан бадали узу узхъан шлуб, асиллу вуйиб вари гъапIунза ва гъит Аллагъу Тааьлайи, узу Чан улихъ жаваб тувбан бадали дийигъан, узу футнайин тум гъаз гъубзунва кIуру суал тутруври. Аьгъдарсуз.

Узу жигъиларихъди гюрюшмиш гъахъи вахтна дурарихъди гъуху йиз сюгъбатарикан пуз, натижа ийвуз мушваь герек дар кIураза, фицики дурари хайир тувди кIури, фикир аплурадара. Гъаддихъди сабси, эгер хъайи- хъайибси варибдикан дарпишра, узуз саб жерге жа- жаради вуйи далиларикан пуз ккундузуз, фицики

фуж, гъаз ва фу бадали лихураш аьгъю хъпан бадали. Фукъан ухъу гъапишра, хъа амма мусурмнар сатли апIбаъ асас йишв (метлебувал) Дагъустандин мусурмнарин Духовный управленийин ва госу- дарствойин гъурулушарин арайи разивалинди ляхин апIбаъ а. Хайлиндари Духовный управление тьяккид аплура, гъадму идарийн работникарин зяйифвалин тахсирвал къайд аплура. Думу дюзид дар, кIури пидарза, хъа амма гъаддихъди сабси жарабра фикриаз гъадабгъуб лазим ву, фицики гъидин йигъан ляхний улихъ гъягъюз лазим вуйи къадарнаьди шараитар адар. Аьраба улихъинди чвубхъан бадали дидиз къюб чарх хъувал лазим ву. Ухъу кIурайи дюшюшди саб чарх Духовный управление ву, хъа тмунуб чарх - государствойи идара аплру карханийир. Гъелбетда, эгер къюбеб чархарра сатлиди илдицуруш, думуган аьраба улихъинди илбидиди. Жинивал адар, фицики советарин девриь динагълийиринна компартияин арайи айи аьлакълуриь душманвал айи, жанавринна хуйин арайи айи жорейин душманвализ ухшар вуйибсид. Гъамус дагъустанлуйирин арайи гъадму жорейинстар аьлакълуриь духъну ккундар, чпиз ккунш гъякимар - керимар вушра, ясана аьдати ксар вушра.

Советарин Союз ва компартия гъадаргъну, ва гъи ухъхъан ихъ гъялнан къисмат улупуз шулухъхъан. Эгер булагъ къалу гъабхъиш, думуган булагъди айи шид марциб шулдар. Гъийин вахтна ухъуз Духовный управление ва государствойин зин идара аплру карханыйир мяднар ву. Гъадрари фукъан ухти тясир аплуруш ва уьчйир къабул аплуруш, ари вари дагъустанлуйирин чевал ва гафсабвалара гъадарикан асиллу ву. Гъит Аллагъди ﷺ дурар уждар ляхнар кIулиз адагъбан рякьюин алаьри! Эгер гъаддар гъадму жорейин саягъниинди дилихъиш, ухъухъра жара йишварийсиб къайдасузвал арайиз гъюз мумкин ву. Багарихъди ухъузра ихъ улариинди ухъухъ, Дагъустандъра гъациб гъял рякьюз мумкин ву. Гъидин йигъазкъан ухъуз гъич сабдинра вижна ктайи, ва Аллагъу Тааьлайи ухъуз арханвал тувну, гъаци апIбаз лигнуб ухъу Дугъан заанвализ шюкюр ибшри, дупну ккунду. Гъит гъамусдихъантинара Аллагъди ﷺ ухъу даккнишарихъан ва бедбахтваларихъан уьхри! Гъаму жорейин дюьйиринди вари мусурмнар гъарвахтна Аллагъу Тааьлайихъна илтиклури гъахънийиш ужу хъибдийи!

Аьзиз гъардшар – мусурмнар! Государствойин гъурулуш терг дапIну ккуни ва дявдин гъаракатар гъахъахъна (гъазават) дих аплру ксарин улхбариз лигай, амма хъпехъури мапIанай. Гъаму дюньийин ужувлар, рягъятвалар ва девлетар бадали вуйи дяви гъякълу гъазават дар. Думу футна, гъалмагъал ву, хъа шариаьтди гъалмагълар аплувал къадагъа аплура. Гъамусдин вахт гъазаватдиз вуйи вахт дар. Гъациб вахт гъафиган чав вахтну чакан хабар дебккиди.

Гъарсар дагъустанлуйи фикир дапIну ккунду, ихъ гъваларихъ арайиз гъюру футнийири, гъалмагълари фтихъна хуруш. Яраб ухъхъан гъациб гъадабгъуз шулин? Гъалмагъларин натижайин аьгъ аплайиз гъамусдин гъял аьгъ аплувал ужу ву. Аьзиз гъардшар, гъякимар - керимар тьяккид аплувал ухъухъ аьдатна аьхъна. Узу гъадарин тереф уьбхюра кIури, фикир мапIанай. Йиз уьмриь узуз гъич сар гъяким – керимдихъдикъана дуствалий учуввал алабхъундарсуз. Хъа ухъуз ихъ гъалатIарра дяркъну ккунду. Яраб

халкъ учв чIуруб хъибган, Аллагъди ﷺ гъадмуган чIуру гъякимар- керимарра гъаурдарин? Эгер мусурмнар шариаьтдиз асас духъну яшамиш гъахъиш, Аллагъу Тааьлайи Чав дурар пис гъякимар- керимарихъан уьрхиди.

Советарин гъюкмин вахтари Инхо гъульан вуйи Аьбдул- Гъямид- эфенди Астрахандиз гъягъюру, гъадушваз аьрабжви дуфна кIуру хабар гъеабхъган. Думу вахтари аьрабжви рякьювал малаик рякьювалтIан читин ляхин вуйи. Эгер нагагъ гъациб аьгъвалат алабхъиш, гъацир касдихъди улхузкъана ихтияр тувурдайи. Гъадму аьраб жвиваз чахъди улхуз ккунидар айивал аьгъю гъабхъиш, дишлади жин шулу, фицики, нагагъ чахъди кючейиь адмийирихъди гафар- чIалар аплури гъякълуш, учв чан ватандиз гъаруб аьгъяди. Аьраб жвиваьди гафар- чIалар аплруган Аьбдул- Гъямид - эфендийи зарафат аплуру: «Яв хулаз къяляхъ хътакайиз улихъна вуйи вахтна узу жин аплин ва увухъди гъайихъ». Аьлхъюри, аьраб жвиву кIуру: «Неинки уву жин аплувал, хъа гъацира гъаму государствойиан гъеле рубкъана гъабхуз даршул!».

Хъа гъамус ихъ йигъари арайиз дуфнайи дигиш'валариз фикир тувай: яраб гъи шли- вуш гюзчивал гъабхурайкIана, дагъустандин жигъиларикан фуж ва фунуб къадарнаьди урхуз ясана лихуз гъягъюраш, шли ва фу улупураш ва дурар фу хъади къяляхъ гъюраш? Сабли нубатнаь лазим ву, фицики фуж гъягъиди, фуж уьмрайиз ва фужсана урхуз гъягъюруш, гъадму месэлийр Духовный управленийин ихтиярназ тувувал ва гъадму ляхнар Духовный управленийин дахилнаь ади ккунду. Гъаци апбан бадали госу- дарствойин гъурулушарин ва духовный управленийин арайи аьлакълуриь адарди хай шулдар. Мисал вуди гъадабгъиш, эгер Духовный управление государствойиан экономикайин ва политикайин (сия- сатдин) месэлийригъ гъючIувал яраб дюз вуйин? Ваь, дюз дар, гъаз гъапиш думу Духовный управленийин ляхин дар. Гъацира государствойин гъурулушарин Духовный управленийи гъял дапIну ккуни месэлийригъ гъючIувал герек шулдар. Хъа амма гъаддихъди сабси дурарин чиб чпихъди аьлакълу ади ккунду. Къюр багъри чвуччу чпин мяишат жа- жаради кIули гъабхуру, хъа амма дубхъну ккуни саягъниинди чпин чевалин аьлакълуриь уьрхюру. Гъамци, эгер Духовный управленийи ва государствойин кIулиь айидари мяслаьтниинди ляхин аплури гъахъиш, инша Аллагъ, Дагъустандид ислъгъвали, гафсабвали ва чевали кюкю адабшвиди кIури, умуд кивуз шулу.

Диндин гъардшар, кIваантIан фикир аплинай, эгер къайда жямьяьтди гъар йишваз жара гъабхъиш, дидин натижайиь ухъу фтихъна гъиди? Гъаму месэла гъял апбан зин аьлимарин ва аьлимар дару- дарин, гъякимар- керимарин ва дагъу- стандин вари халкъарин юкIвар иццру духъну ккунду. Яраб кIул иццру гъабхъихъ- антина кIул илбижбан себеб айинхъа? Думу кIулхъан уьзур кубчIвайиз улихъна хъичIихну ккунду. Гъамушваь узу дупнай- иб йиз хусуси фикрар ву, белке узу гъякълу даршул. Эгер гъаму месэла гъял апбан зин хъана гъякълу фикрар аш, йипай, узур аьдати инсан вуза, мяслаьтнан жолега абгъаз ккигурайир.

Гъаму месэлайин зин къаназ улхуз шуйи, хъа амма ихтилат гъатIабцувал тьярифнан ляхин дар, гъаддиз гъамдинди узу ккудукIураза.

ВАРИТАН УЖУР ДАРУ КАС ЧАН ПИСВАЛИХЪАН (ЧИРУВАЛИХЪАН) ГЪДУЧИВУЗ,
ГЪИРАГЪ ЙИВУЗ ГЪИТРУР ВУ

ГЪЯДИС

КІВАИН АПІУХЪА

1 « Гъадму вягъшивалин гъадиса Мягъячгъала шагърин Сепараторный поселокдиъ гъабхъиб вуйи. Хябяхъдин гъудгнин вахтназ улихъна, рабочий йигъандин къяляхъ чан хулаз хъадакн гъюрайи вахтна (ушв гъибтуз клури) думу айи машиндиина инсафсузвалиинди гюллийр уълюрхну. Мусурмнарин юквар гъадму хабар иццрушин кади гъисс гъапну.

Шилхъан гъациб ляхин аплуз гъабхъийклана? Яраб гъадму рамазандин гирами вазли Аллагъ ﷻ бадали чан ківвантан вари ужувлан ляхнар аплури гъахъи, инсанариз хайирлу гъадму касдиина шилхъан хил за аплуз гъабхъийклана?

Думу лапра зигъимлу, фикирлу, гюллугъчивалин гъиссвал кайи ва рюгълувал жигъатнаан жанлу кас вуйи. Дугъу арайиз адагъру вари темйир, Исламдин шикиллуваллиантин арайиз хури гъахъну. Дугъу яратмиш гъаплу вари материалар инсанарихъна ккунивалин гъиссаринди албагнаидар вуйи.

Учвур разивал улупай, фицики яратмиш аплу гъарсаб ляхниз жвуван хусуси ківан гъиссар тутрувди арайиз хуз шулдар Хъа дугъан ва «ТВ - Чиркейи» чакъди лихури гъахъидарин юквар Аллагъу Тааблайихъна вуйи ккунишин ади ацнаидар вуйи, жямъаьтлугъдиз хайир тувуз аьшк ади. Ари гъаддиз дурарин передачийира инсанариз гизаф ккунду.

Абдулла Аьлишаев варидализ аьгъяйи ва варидализ ккундийи. Дугъу гизаф къадар документалин фильмиир адагъну. Дугъаз айи ляхнин шартвал варитан асас темйир агувал, жямъаьтдиз хайирлудар ва жямъаьт сикинсуз аплураидар вуйи. Саб жереге журналистарси дарди дугъу гъожатарин - гъалмагъларин бинайин алди чаз гъазанжар гъадагъуб метлебназ ва эйсирин заказниинди вуйи передачийр гъазур аплури шулдайи.

Тамашачийри Абдуллагъди адагъу наркоманияйин ва СПИД-дин хаталувализ къаршуди гъазур дапнайи видеофильмириз аьхю кымат тувра. Чиркин идеологияйиз – вагъабизмийиз къаршуди вуйи гъялам дугъу гъазур гъаплу «Аьдати вагъабизм» клуру документальный фильм вуди гъисаб аплуз шулу.

Абдулла Аьлишаев варидализ аьгъяйи ва варидализ аккундийи. Дугъу гизаф къадар документалин фильмиир адагъну. Дугъаз айи ляхнин шартвал варитан асас темйир агувал, жямъаьтдиз хайирлудар ва жямъаьт сикинсуз аплураидар вуйи.

Дугъу ва чакъди лихури гъахъи юлдарши Ингушетияйи Исламдин дарсар кивру мектебарий жареди урхувал тешкил аплбан гъакънаан фильм адабгънийи ва думу улупнийи. Дугъаз Дагъустандиъра гъаци дапну ккундийи.

Фуж «ТВ - Чиркей» телекомпанияйи гъазур гъаплу «Ихь Дагъустан» клуру фильмириз гъилигнуш, Абдулла

Исламдиз къаршуди дяви ясана ужударстариина хюрч аплуб

Рягъматлу Абдулла Аьлишаев ківан аплури



Аьлишаев Дагъустандин лайикълу бай ву ва гъацдар артухъди духъну ккунийклана, пици.

Республикайин адлу артистари Абдулла Аьлишаевди ктагъу (яратмиш гъаплу) шиърарикан вуйи мяллийир ва нашидар аплура. Чан жикъи 39 йисандин уьмрий дугъу гизаф къадар ужувлан ляхнар гъаплу ва ихъ вахтан читин девриз бахш дапнайи

темйириан вуйи ва ихъ гъидин уьмриз бахш дапнайи дугъан вари зегъметар ва яратмиш аплбар ктухуз мумкинвал адар.

Гирами Рамазандин вазли Абдулла Аьлишаев гъаму уьмриан гъушну.

Гизафдари думу гъаз йивну гъакнииклана, клури гъерхиди. Гъаз гъапиш думу я дилаварчи кас дайи, я политик, гъич сарин йишвйнара (гюллугназ) гъюз клулиъ фикиркъана

гъабхъир дайи, тларашчивал гъаплу, инсанар йивну гъаклирра дайи...

Дугъу жямъаьтлугъдиз ужувлан ляхнар ва ислягвал гъахну, ихъ веледар наркоманар дархъбан, дурари эдебсуз уьмур хъадрапбан, яркварариз дурушбан ва гъайванатариз ухшармиш дархъбан бадали тясирлу женг гъубхну.

Абдулла Аьлишаев йигъ - йишв дарпиди Аллагъу Таабла рази шлу саягъниинди зегъмет зигури гъахъну ва Аллагъдин ﷻ рякъюъ шагъидси гъакну. Белке дугъу чан дюьйириъ уху Халкъ Гъаплурихъна чаз гъациб аьжал тувувал ккун аплури, илттиклури гъахъуншул?!

Шилхъан гъациб алчагъ ляхин аплуз гъабхъийклан? Гъациб усал ляхин аплуз, гъациб инсафсузвалин лик алдабгъуз гъахъир фуж вуйклана?

Исламдин душмнари чпин улихъ хайирлу ляхнарин дережа заануб вуйидар танкъ аплбан метлеб дивра. Гъацдар гъаракатарий мусурмнарин аьдрисназ гъамциб мялумат туврайивал гъисс шула: «Учву гъадушварий, ичв мистарий, дусай ва клул за аплуз ва жарадариз Исламдикан пуз гъаракат мапана, хъа нагагъ гъаци гъапиш, гъацдар ксар



йивну йикидича. Сейидмугъаммад - гъяжи Абубакаровси, Къурамугъаммад - гъяжи Рамазановси, Губден гъульан вуйи имам Нурмугъаммад - гъяжи Гъяжимиягъмедовси ва жарадарси».

Хъа ваъ! Исламдин ва вари инсаниятдин душмнарив фукъан гизаф къадарнаъди пулин чъевэр ва мумкинвалар ашра, хъа амма мусурмнарив айиб дурариз адар. Думу гъаму гафар ву: «Ла гъявла ва ла къуввата илля биллагъ» - «Аллагъдилан ﷻ гъайри, гъич саризра къувват ва къудратлувал адар».

Гъаци йикбиинди ва мусурмнарин киваз иццу аплбиинди дурар хъана артухъди сати ва мюгъкам шулу ва хъана къувватлу шулу, Исламдин душмнарив даккун - даккунди. Сар кас йивну йикбиинди гъадму саягъниинди ляхин аплури гизаф къадар ксар арайиз гъюру.

Гъадму жорейиинди гъар ражну йивну йиклувал - думу мусурмнарив «улихъна гъягъбаз» вуйи буйругъ ву ва дурари жямъаьтлугъди кам хъувал гъисс дарапруганси аплуди, хъа исламдин ляхин саб дакъикъайиъра дийибгъидар, гъеле артмиш хъибди.

Рябкъюрайиганси, гунгъари кацнайи ва ифди алацнайи къувватар а. Дурариз Исламди хурайи аквнахъан гучлура. Дурариз ягъли кляклар али минаретарин успагъи мистар ва гъадушваризди учлврайи агъзраинди мусурмнарин къадар гъябкъган (иллагъки жвумийин йигъари), дурарик гукнишин кабхърайиганси ву. Рябкъюрайиганси, медресийр ва Аллагъдин ﷻ хулар ачмиш аплбан гъякънаан вуйи хабрари дурар гукни дапна, дурариз цийиди ачмиш аплурайи исламдин урхбан идарийрикани гъерхъган дурарин улар бюркюю, шула, дурар гучвал кади исламдин телепередачийриз лигура, дурар исламдин мялуматарин дакъатар артухъ шулайивали гукни дапна...

Мусурмнар йивну йиклуз шулу, хъа амма Ислам танкъ аплуз хъибдар. Гъаму дюньяйи диван аплбахъан гъергуз шулу, хъа Гъияматдин йигъан диван аплбахъан гъергуз хъибдар.

АЛЛАГЪДИ ﷻ АНЖАГЪ УЖУВЛАН ВА ГЪЯКЪЛУ ЛЯХИН ВУЙИБ КЪАБУЛ АПІУРУ

ДИН – ТІААЪТДИКАН, ТЕРБИЯЙИКАН

Шихмягъмад – гъяжи ШИХАМИНОВ

ТІАПІУРИЗ ЧАН КІВАЪ ИМАН, АПІУР РЯГЪИМ

Завар, жилар халкъ гъапур сар Аллагъ ву,
Ахирзаман Чан къувват ву, аьгъяхъуз.
Гъякъна нягъякъ абгру судья Аллагъ ву,
Ківаъ Иман тіапІ Учв вухъна рягъимлу хъуз!

Завъин ригъ, ваз, хядар ерлешмиш гъапур,
Хъуз жилъин ийгъ - йишв гъапур амур гъапур,
Дюньяси Ахиратра къисмат апІур,
Аллагъ вуйиб аьгъю апІин, эй инсан!

Мисакъдин ийгъан рюгъяр гъахънихъ буржлу
Вари удукъру рягъимлу Аллагъдиз.
Гъамус ухъу Аллагъдиз вухъа буржлу,
Ківаъ мюгъкамди Иман тіапІдихъа гъаддиз.

«Ав, Аллагъдихъ хъугъназа!» кІуру, гъерхиш,
Хъа Иман ківаъ ади апІурдар гъудгнар.
Аллагъди апІуринхъа Женнет багъиш,
ДарапІруган чаин али фарз - гъудгнар?

Аллагъди гъюкмар дивну сеbeb ади,
Ахиратдиз гъягъюз савабар хъади.
Дин - тіааът хъапІуриз, ківаъ Иман ади,
Диван апІур рягъимлу Аллагъ учв ву.

Ислам дин - тіааътдиз гъюрмат гъапІдариз,
ДикІур Аллагъди савабар артухъди.
Варидарихъди гъюрматра гъюбхдариз,
Дугъу улупур йишв Фирдавс женнетди!



Багъир РАЖАБОВ

ЛА ИЛАГЪА ИЛЛА ЛЛАГЪУ

Худа, Уву ківаин хури,
Ача Яв дин – тіааът хъапІри.
Бизар дарди ківаан кІури:
«Ла илагъа илла ллагъу!»

Бисну Яв гъякъ къалам хили,
Къиблайиз икрам апІури,

Ният дапІну ача, кІури:
«Ла илагъа илла ллагъу!»

Йигъан хъубан марцци ківаан,
АпІурача ич фарз - гъудган.
«Аллагъ Сар ву!» кІури гъарган,
«Ла илагъа илла ллагъу!».

Хъад, къюрд, ригъ, ваз, мархъ, йиф – вари
Савкъатар Яв вучуз багъри,
Ача Яв рякъ – хулиф кІури:
«Ла илагъа илла ллагъу!»

Аьлам элбезд Яв амри
Халкъ апІуз гъитунва вари.
Сар Яв гъадри ачуз кІури:
«Ла илагъа илла ллагъу!»

Вахт улубкъна гъамус дургъуз,
Яв илим – Ислам къадарсуз.
Пак дубхъначуз Къуръандин Жуз,
«Ла илагъа илла ллагъу!»

Худа, Уву гъурмиш гъапІу
«Сяаът» даима жанлу ву.
Дидиз анжагъ тек Сар Уву
Уьмур тувунва дилибкІури.

ПОДПИСКА – 2009

«Ассалам» халис мусурмнарин газат ву

Ассаламу аьлейкум, гъюрматлу мусурман чвийр ва чйир! Пагъ, гъаму тебрик «ассалам» кІуру гафназ ва «Ассалам» ччвур тувнайи газатдиз фукъан мубаракди рякъюрдаринхъа?! Ари гъаддиз, гъюрматлу мусурман гъардшар ва чйир, ухъуз лапра багахъна вуйи - багъри чІалниинди удубчІураи «Ассалам» газатдиз учву 2009 – пи йисаз подписка дапІну ккунивалин гъякънаан ційийкІултІан илтІкІурача. Анжагъ учвухъди учуаьлакъа уьбхюррача, фицики гъаму мусурман газатдиз подписка апІнайчва кІури, учвухъна илтІкІурдар ва даршиш ичв маважибдикан ясана пенсияйикан пул ктабгидича, кІурудар хъидар. Анжагъ учву ичв хушниинди, 2009 пи йисаз ихъ «Ассалам» газатдиз подписка апІуз шерик духъну ккунду. Вари йискъубаь удубчІурайиб 180 манат ву.

Магъа ихъ гирами Рамазандин ушварин нубатнан вазра аьхирихъна гъафну. Учву Аллагъ бадали гъидису ушвар Чав Рягъимлу ва Къудратлу Первердигари къабул апІри ва ухъу Женнетдиз гъягъру агъларикан ишри! Гъяждиз ва ухъуз варитІан багъалу касдин – Мугъяммад Пайгъамбарин ﷺ Ватандиз – гирами йишвариина гъягъюз гъязурлугар гъахурайидарин ківаъ айи ниятарра бегъемди кІулиз удубчІури, иншаАллагъ!

Дугъридан, ухъузра хабар дарди ихъ уьмрикан ийгъар - вазар ктагъура ва сакъюдар вазарилан ихъ уьмрикан сабсана йис гъябгиди. Ари гъаддиз гъарсар касди чан абйир - бабариз, багъахълуйириз, гъуншйириз, гъуландариз, яшнан аьхюдариз гъюрмат апІуб, хъа читинвалиь айидариз чяхъан шлу саягъниинди кюмекнан хил гъачІабккуб лазим ву. Саб гафниинди, ухъкан гъарсари гъаму жилин илмиди ужувлан шил гъибтну ккунду. Ихъ уьмриз лазимлу вуйи эдеблу терефарихъди, сабпи

нубатнаь ухъуз багъалу Ислам диндин гъякълу рякъюьди гъягъюз кюмек туврайи ичв гъюрматлу юлдаш багъри табасаран чІалниинди удубчІураи «Ассалам» газат ву.

Саб жерге фагъумсуз ва ягъурсуз политикари гъаз - вуш Ислам дин экстремистарихъди аьлакъалу апІуру. Гъацдар бейнавйириз Мугъяммад Пайгъамбарин ﷺ гъаму гъядискъана ківаин гъапІин ужу ву: «Шли кучІал апІуруш, дицир кас йиз умматдикан дар. Шли сар - сариина яракъ за гъапІнуш, гъацир кас йиз умматдикан дар, чав фукъан тасбигъ гъапІнушра, Аллагъ ﷻ ківаин апІурушра ва Къуръан урхурушра». Ари дикъатлуди фикир тувхъа: ківаъ ужуб иман айир гъич сабанра рябатсуз ляхнариз: къяпавализ, тІафалвализ, гъярамзадавализ, рихшантвализ, алдатмиш'вализ, руш'ватчивализ шерик даршул, гъаз гъапІиш ихъ баркаллу Ислам утканвалин ва марццивалин дин ву. Гъелбетда, Ислам диндин вари шартІар хъайи - хъайибси тамам апІурайирин фикриз зиихъ кудухнайи чиркин лишнар кІулиз адагъбан къаст дяргърувалиин умудлу хъидихъа. Хъа Ислам диндин гъякълувал тасдикъ апІурайиб Къуръан ву.

Ухъу гъар йигъан Аллагъу Тааьлайи ухъуз тувнайи ужувларикан мянфяаьт ктабгъураха. Инсан гъяйванатарихъан фикирлувалинди тафавутлу вуйивалра аьгъяхъуз. Жвуваз Аллагъу Тааьлайи тувнайи аькъюл - фикир аьгъювалар гъадагъбаз харж дапІнура ккунду. Аьгъювалар айири гъадрикан мянфяаьтра кадабгъну ккунду. Ихъ Пайгъамбарин ﷺ гъядисдиь дупна-йиганси, «Инсанарикан ужурсир ярхи уьмур хъапІур ва ужудар ляхнар кІулиз адагъру ву».

Ав, инсандиз аьгъювалар айивал варитІан аьхю девлет ву. Гъаддин гъякънаан алчагъ ксари йивну гъакІи

муфтий Сейидмугъяммад – гъяжи Абубакаровди учв Дагъустандин мусурмнарин диндин идарайиз регъбервал туври гъахъи вахтна гизаф къадар мянфяаьтлу ляхин кІулиз адабгъну. Хъа жвуву гъадагъу аьгъювалар инсанариз зарар тувру саягъниинди ишлетмиш дапІну ккундар. Мугъяммад Пайгъамбарин ﷺ гъядисдиь дупнайиганси, «Шли гъюжатар бадали ясана чан агъирвал улупуз кІури аьгъювалар гъадагънуш, гъит чав чаз жегъеннемдиз йишв гъязур апІри».

Гъамусдин девриь гъарсар касдиз светскийси, диндин аьгъювалар гъадагъузра яркъу рякъ ачмиш дапІна. Гъадму терефнаан «Ассалам» газатдин метлебувал аьхюб ву. Гъаддиз йискъубан арайиь багъри чІалниинди вуйи «Ассалам» газатдиз подписка апІбаз удубчІуру 180 манат пул кІюгъял мапІанайчва, гъюрматлу мусурман гъардшар ва чйир! Подписка апІру вахт ккебгънайиваликанра учвуз ківаин апІурача ва учву гъюру йисаз подписка апІрувалик умудвал киврача. Хъа сурчанра, сачра ва ццира подписка дапІнайидар ашул. Гъадриариз артухъди чугъсагъул кІурача. Гъит ичв гъарсарин хулаз «Ассалам» газат гъюрматлу «хялижв» ибшри!

Иллагъки мусурман диндин гъякънаан аьгъювалар тувуб метлебниинди учу гележегдиьра адлу шейхарин, аьлимарин макъалйир ва ківаин апІбар ишлетмиш апІидича, иншаАллагъ. Гъюрматлу ватангълийир! Учвуз «Ассалам» газатдин ляхниь иштирак хъуз, учвуз мусурман диндикан аьгъдру терефарикан гъерхуз, суалар тувуз мумкинвал туврача ва теклиф апІурача. Гъелбетда, сабпи нубатнаь диндин регъбарари - гъуларин имамари, аьлимари, диндикан аьгъю ва баркаллу уьмур хъапІу ксари учухъди аьлакъа дубхну ккундучуз.



Ас-Салам-фото

Гъюрматлу мусурман гъардшар ва чйир! Нагагъ учвуз ихъ мусурман диндихъди аьлакъалу вуйи месэлийирикан гъавриь адруб гъерхуз ккундуш, учвуз бикІай, мусурман аьлимар учвуз жаваб тувуз гъязур ву. Гъюрматлу ватангълийир! Ичв кагъзариз, телефондиан вуйи зенгариз ккилигурача. БикІай, ихъ багъри «Ассалам» газатдин ляхниь иштирак ихъай. Артухъди ужувлар, бахтар ишричвуз!

Аьзиз юлдшар! Учвкан вуйи саб тавакъу (тІалаб) айич: жвуван багъри табасаран чІалниинди удубчІураи «Ассалам» газатдиз подписка апІру вахт дуфна. Хъана текрар апІурача: подписка апІуз ківаьлан магъапІанай. Хъа учу, зиихъ узу гъапиганси, ичв теклифар ва тІалабар тамам апІуз чалишмиш хъидича ва гележегдиьра «Ассалам» газат ужувлан ляхнариз, инсанарин арайиь дуствал ва мясляаьт уьбхбаз ишлетмиш апІидихъа, иншаАллагъ!

Хъана учву 2009 –пи йисаз «Ассалам» газатдиз подписка дапІну ккуниваликан ківаин апІурача. Гъит «Гъарсаб хизандиз «Ассалам» газат!» гъюрматлу «хялижв» ибшри!

Гъит ухъу Къудратлу Аллагъу Тааьлайи лазим вуйи, хайирлу аьгъювалар гъадагъру ксарикан апІри! Амин.

Учвухъна гъюрмат уьбхюрайир газатдин редактор Пирмягъмед КЪАСУМОВ

ИМШАХВАЛИХЪ МЮГЪТАЖ ВУЙИР УЖУВЛАХЪРА МЮГЪТАЖ КАС ВУ

ГЪЯДИС

СУАЛАРИ ЖАВАБАР ТИАЛАБ АПИУРА


Газат урхрударин суалариз ДИУ - йин мялим **Мягьяммедрасул АШИКОВДИ** жаваб тувра

Гъядиз гъушу вахтна, Мединаий гъахьиган, узу гъядиз душнайидари (ва гъадму гъисабнаан узура) гъамциб ляхниз дикъатлу фикир тувнийза - Пайгъамбарин ﷺ накъвдин (никърин) улихъ дийигънайиган фици дюаь аплуйиш. Саб жерге инсанар накъвдихьинди машна - машди дийигъуйи ва Кябайхьинди кьял йивну, хъа тмундар клуруш, жара саягъининди. Гъадрикан фундари дюзди аплурайклан?

- Пайгъамбарин ﷺ накъвдихьна (никърихьна) гъягъру касди учв Пайгъамбарин ﷺ накъвдихьинди машна машди илтйиклуб лазим ву ва Кябайхьинди кьял йивну. Думу имам Шафийийн мазгъаб ву, хъа гъацира ахъюнуб пай жара мазгъабарин алимарина. Пайгъамбарин ﷺ накъвдихьна гъювалра сунна ву. Аллагъди Гъаънайири ﷺ гъапну: «Узу йикълалан кьяляхъ йиз накъвдихьна гъафир узу чивиди айи вахтна узухъна гъафиганси гъисаб аплудиза ва фуж гъядиз дуфну узухъна дарфиш, гъацир касди узухъна гъюр-

матсузвал улупну».

Гизаф къадар гъякълу гъядисари гъаддин гъякълан шагъидвал аплура.



Ас-Салам-фото

Жвумийн гъудгниз вуйи ният фарзси ясана суннат-гъудганси дапну ккундин? Эгер фарзси аплуруш, лисундинуб фици аплуру, гъаз гъапиш кьуб фарз шулаки?

- Жвумийн гъудгнин ният фарзси дапну ккунду, лисунгандинубра фарзси ният дапну ккунду.

Гъадму гъудган ухъу йирхъубпи чарасуз гъудганси аплурдархъа, хъа умудлувал хъпан ва вари жюрейин кьвахънивалар арайиан адаъбан бадали аплурахъа. Фицики жвуми йигъандин шартларикан саб гъадму жвумийн гъудгниз вуйи ниятна гъадму саб гъулаъ гъахурайи жвумийн гъудгнин улихъди дубшну ккундар, хъа гъацира кьуби ниятарра сатиди дарапбан бадали.

Ари гъаддиз лисундин гъудган аплуру, гъадму шартлар кьуби гъахбан умудвал (дикъатвал) адрувализ лигну, ва гъацира, эгер жвумийн гъудган гъулаъ анжагъ саб йишваъ аплури гъашиш, думуган гъадму йишваъ жвумийн гъудган аплувал шара шартлар адрувализ лигну себеб шулу - думу себеб яшнакк ккуркънайи, дюзди «Аль-Фатигъа» сура урхуз

шлу 40 жили кас адрувализ лигну.

Хъа кьуб фарзнан гъякълан вуйи месэлайикан улхруган, думу дюз гъюрдар ва вагъабитари чпиз кадагънайиб ву. Гъаз гъапиш инсанди кьуб фарзра кьуби духну ккунду, фицики гъудган жямъаьтдихъди сатиди саб ражну цийи алаплувал дубхъну ккуни ляхин ву, мисал вуди гъадагъиш, сар касди чав сари ясана жямъаьтдихъди гъудган гъапнуш, думуган дугъу гъаму гъудгнин вахт ккудубклайиз улихъна гъадму фарз - гъудган цийи алаплувал дубхъну ккуниб ву, гъеле дугъан сабпи гъудган гъякълуб вушра (хъа эгер дарш, цийикълултан аплуб чарасуз ву). Ихъ шейхарин шейх Абул - Къасум Бакрийи тасдикъ аплура, фицики гъудган саб ражнутан артухъ цийи алапну ккунду ва гъудгнин вахт ккудубклайиз улихъна. Гъаддиан рябкъюрайиганси, фарзарин къадар 10 гъабхъишра, хай шулу.

Саб бязи ксари чпиз кьуби вахтназ улихъна ккимиди накъвдигъ йишв гъязур аплуру (улупуру), гъеле улихъ ккимидитлан накъв (никъ) ебккуру ва думу гъязурди дебккру. Исламдин шартлариз асас духъну кьубиш, гъаци аплуз хай шулин?

- Эгер сар касди чаз кьуби гъязур дапнайи гелегеддин накъвдиз (никъриз) вуйи жил чан хусусият вуш, ясана дугъу гъадму жилин эйсийихъан чаз масу гъадагъуруш, думуган хай шулу. Хъа эгер гъадму жил вахъфу вуш, мисал вуди гъадагъиш уьмуми накъваригъ вуйи ва эйси адру йишвси, думуган хай шулдар.

Кюгъне ва ккидирчнайи накъваригъ (никъаригъ), гъич фуклара алдру марцци майдан дубхънайи йишвъин хулар тикмиш аплуз хай шулин?


- Хай шулдар, гъаз гъапиш гъадму йишв вахъфу ясана гъярам ву.

Узуз музыкантвалин образование азуз ва аьгю дубхъну ккундийуз, фицики жвуван хизандин игътияжар гъуркълан бадали пулихъ вуйи серенжемарий музыка йивувал (хай шлу алатариин) къадагъа ляхин вуйклана?

- Уву фуну ва фицдар серенжемарий уйнамиш аплураш гъисабназ гъадагъуб лазим ву. Эгер хай шлу серенжемар вуш, думуган уйнамиш аплуз шулу. Мисал вуди гъадагъиш, сумчир, думу хай шлу серенжем ву. Эгер гъадму серенжемдиъ арагъ - чяхир аш ва думу убхъуруш, жилар ва дишагълийир сатиди деънаш (дуснаш), гъацдар серенжемариз- сумчрариз гъягъювал варидариз къадагъа дапна. Гъацдар сумчрариз гъягъру вари ксари чпиз гунагъ гъазанмиш аплуру, хъа музы-

кантдиз артухъди гунагъ шулу, фицики думу инсанар кефлу аплбаъ иштирак шулу.

Гъациб музыкайи анжагъ артухъди гунгъар хъуз мумкинвал яратмиш аплуру ва гъадрикан гунагъ инсанариз шадуб шулу ва гъадму гунагъ гъазанмиш аплбахъна аьшкълувал арайиз хуру. Пайгъамбари гъапну ﷺ: «Шли гунагъ арайиз гъюз шлиз - вуш мумкинвал тувнуш, гъеле гафнан саб пайниинди дубхънура, гъацир кас гъадму гунагънан иштиракчи ву».



Ас-Салам-фото

Кечмиш гъахъи (рягъматдиз гъушу) кас кафнигъан гъидиржбан кьайда фициб ву, эгер гъаддин ерина гъадму кас гъядиз гъушгандин игърам алабхъувал ишлетмиш аплуруш?

- Дугъан майит аьдати кафнигъан фици гъидиржуруш, ари гъаци гъидиржуру.

Рузнама

ноябрь

дни	утрен.	восх.	обеденный	послеобед.	вечерн.	ночн.
1	4.41	6.22	11.33	14.20	16.47	18.41
2	4.42	6.23	11.33	14.19	16.46	18.12
4	4.44	6.26	11.33	14.17	16.44	18.10
6	4.47	6.28	11.33	14.15	16.41	18.07
8	4.49	6.31	11.33	14.13	16.39	18.05
10	4.51	6.33	11.33	14.11	16.37	18.03
12	4.53	6.35	11.33	14.09	16.34	18.00
14	4.55	6.38	11.33	14.07	16.32	17.58
16	4.57	6.41	11.34	14.06	16.31	17.58
18	4.59	6.43	11.34	14.04	16.29	17.57
20	5.01	6.45	11.34	14.03	16.27	17.57
22	5.03	6.48	11.35	14.03	16.26	17.56
24	5.06	6.50	11.36	14.02	16.25	17.55
26	5.08	6.52	11.36	14.00	16.23	17.53
28	5.10	6.54	11.37	13.59	16.22	17.52
30	5.12	6.55	11.37	13.58	16.20	17.52

Учредитель

Благотворительный фонд «Путь». Газета печатается по согласованию и одобрению Духовного управления мусульман Дагестана

Редакционный совет

Председатель редакционного совета муфтий РД Ахмад-хаджи АБДУЛАЕВ

заместитель муфтия РД Махди-хаджи МУТАИЛОВ Мухаммад-Рамазан РАДЖАБОВ

Редактор Пирмагомед КАСИМОВ

Канонический редактор Мухаммад-Рамазан РАДЖАБОВ

Художник Саид САИДОВ

Компьютерная группа Асият ХАНОВА Ахмед МАГОМЕДОВ

Менеджер Мухаммад ХИРИЯСУЛАЕВ

При перепечатке ссылка обязательна. Набрано и сверстано на компьютерной базе газеты «Ас-Салам».

Газета зарегистрирована Управлением Федеральной службы по надзору за соблюдением законодательства в сфере массовых коммуникаций и охране культурного наследия по ЮФО (г. Ростов-на-Дону).

Свидетельство о регистрации ПИ № ФС 10-6401 от 15 декабря 2006 г.

Индекс 51325

Отпечатано в ООО «Дом печати» по адресу: пр-т Акушинского, 20. Заказ № _____

Сдано в печать 12 октября 2008 г.

Тираж 1 000 экз.

Адрес редакции

367015, РД, г. Махачкала, ул. М. Ярагского, 128.

Тел.: (8722) 61-00-64.

По вопросам подписки и доставки обращаться по телефонам:

по Республике Дагестан — 8-988-699-28-24 по г. Махачкале — (8722) 914-222.

E-mail: info@assalam.ru; www.assalam.ru